

BOSNA I HERCEGOVINA
PARLAMENTARNA SKUPŠTINA
PREDSTAVNIČKI DOM
Asim Sarajlić, poslanik

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO: 31-08-2012			
Organizaciona jedinica	Klasifikaciona oznaka	Redni broj	Broj priloga
01	01	37/12	

Predstavničkom domu Parlamentarne skupštine Bosne i Hercegovine
n/r predsjedavajućeg

Predmet: Prijedlog amandmana na Ustav Bosne i Hercegovine

Shodno odredbama članova 132 i 133 Poslovnika Predstavničkog doma podnosim prijedloge Amandmana II i Amandmana III na Ustav Bosne i Hercegovine koji po stavu Stranke demokratske akcije predstavljaju implementaciju presude Evropskog suda za ljudska prava u predmetu Sejdić i Finci protiv Bosne i Hercegovine.

S poštovanjem

Asim Sarajlić
poslanik i predsjednik Kluba SDA

Sarajevo, 30. august 2012. godine

Prilog: Amandman II na Ustav Bosne i Hercegovine
Amandman III na Ustav Bosne i Hercegovine

Na osnovu člana X 1. Ustava Bosne i Hercegovine (Aneks 4. Općeg okvirnog sporazuma za mir u Bosni i Hercegovini), Parlamentarna skupština Bosne i Hercegovine na _____ sjednici Predstavničkog doma, održanoj _____ godine, i na _____ sjednici Doma naroda, održanoj _____ godine, donijela je

Amandman II na Ustav Bosne i Hercegovine

U Ustavu Bosne i Hercegovine član IV 1. mijenja se i glasi:

„ 1. Dom naroda

Dom naroda se sastoji od 21 delegata od kojih dvije trećine iz Federacije (uključujući pet Hrvata, pet Bošnjaka, dva Srbina i dva iz reda Ostalih) i jedna trećina iz Republike Srpske (uključujući četiri Srbina, jednog Bošnjaka, jednog Hrvata i jednog iz reda Ostalih).

- a) Nominovane hrvatske, bošnjačke, srpske, odnosno delegate iz reda Ostalih iz Federacije biraju hrvatski, bošnjački, srpski, odnosno delegati Ostalih u Domu naroda Federacije. Nominovane srpske, bošnjačkog, hrvatskog, odnosno delegata iz reda Ostalih iz Republike Srpske biraju srpski, bošnjački, hrvatski, odnosno delegati Ostalih u Vijeću naroda Republike Srpske.
- b) Trinaest članova Doma naroda sačinjava kvorum, pod uslovom da su prisutna najmanje četiri bošnjačka, četiri hrvatska, četiri srpska i jedan delegat iz reda Ostalih“.

U Ustavu Bosne i Hercegovine član IV 3.b) mijenja se i glasi:

„Svaki dom će većinom glasova usvojiti svoj Poslovnik o radu i izabrati među svojim članovima predsjedavajućeg i dva zamjenika predsjedavajućeg, s tim da će se mjesto predsjedavajućeg rotirati između ova tri lica koja sva tri moraju biti iz različitih konstitutivnih naroda ili reda ostalih“.

Amandman II na Ustav Bosne i Hercegovine stupa na snagu osmog dana od dana objavljivanja u Službenom glasniku Bosne i Hercegovine, a primjenjivat će se od narednih općih izbora u Bosni i Hercegovini.



Obrazloženje

I – USTAVNI OSNOV

Ustavni osnov za usvajanje Amandmana II na Ustav Bosne i Hercegovine sadržan je u članu X 1 Ustava Bosne i Hercegovine.

II - RAZLOZI ZA DONOŠENJE

Razlog za donošenje ovog amandmana je potreba usklađivanja člana IV Ustava Bosne i Hercegovine s Evropskom konvencijom o zaštiti ljudskih prava i osnovnih sloboda i njenim protokolima, a što proizlazi i iz presude Evropskog suda za ljudska prava u Strazburu u predmetu Sejdić – Finci protiv Bosne i Hercegovine.

III OBRAZLOŽENJE POJEDINIH RJEŠENJA

Ovim amandmanom u strukturu Doma naroda uvode se i članovi iz reda Ostalih, čime se u ovoj oblasti uklanja diskriminacija prema građanima Bosne i Hercegovine koji ne pripadaju ni jednom od konstitutivnih naroda.

Rješenjem iz ovog amandmana da se delegati iz sva tri konstitutivna naroda biraju iz oba entiteta u Dom naroda, otklanja se diskriminacija u odnosu na konstitutivne narode. Dosadašnjim rješenjima da se Bošnjaci i Hrvati biraju iz Federacije, a Srbi iz Republike Srpske diskriminirani su Srbi iz Federacije i Bošnjaci i Hrvati iz Republike Srpske.

Promjena koja se odnosi na član IV 3.b) je vezana za strukturu kolegija domova Parlamentarne skupštine, gdje je takođe potrebno ukloniti elemente diskriminacije.

IV FINANSIJSKA SREDSTVA

Za provođenje ovog amandmana bit će potrebno osigurati dodatna sredstva u budžetu institucija Bosne i Hercegovine, jer se povećava broj delegata u Domu naroda Parlamentarne skupštine Bosne i Hercegovine.



Na osnovu člana X 1. Ustava Bosne i Hercegovine (Aneks 4. Općeg okvirnog sporazuma za mir u Bosni i Hercegovini), Parlamentarna skupština Bosne i Hercegovine na _____ sjednici Predstavničkog doma, održanoj _____ godine, i na _____ sjednici Doma naroda, održanoj _____ godine, donijela je

Amandman III na Ustav Bosne i Hercegovine

U članu V Ustava Bosne i Hercegovine poslije naslova člana „Predsjedništvo“, a prije tačke 1. (Izbori i rokovi) postojeći tekst mijenja se i glasi:

„Predsjedništvo Bosne i Hercegovine se sastoji od tri člana od kojih se dva biraju neposredno sa teritorije Federacije, a jedan se bira neposredno sa teritorije Republike Srpske. Sva tri člana Predsjedništva moraju biti iz različitih konstitutivnih naroda ili reda ostalih.“

U članu V2.d) druga rečenica mijenja se i glasi:

„Takva odluka će biti odmah upućena odgovarajućim delegatima u Domu naroda Federacije ili Vijeću naroda Republike Srpske, zavisno od toga koji član Predsjedništva je takvu izjavu dao.“

Ostali tekst u članu V2.d) ostaje neizmijenjen.

Amandman III na Ustav Bosne i Hercegovine stupa na snagu osmog dana od dana objavljivanja u „Službenom glasniku BiH“, a primjenjivat će se od narednih općih izbora u Bosni i Hercegovini.



Obrazloženje

I - USTAVNI OSNOV

Ustavni osnov za usvajanje Amandmana III na Ustav Bosne i Hercegovine sadržan je u članu X 1. Ustava Bosne i Hercegovine.

II – RAZLOZI ZA DONOŠENJE

Razlog za donošenje ovog amandmana je potreba usklađivanja člana V Ustava BiH sa Evropskom konvencijom o zaštiti ljudskih prava i osnovnih sloboda i njenim protokolima, a što proizlazi i iz presude Evropskog suda za ljudska prava u Strazburu u predmetu Sejdić i Finci protiv Bosne i Hercegovine.

III - OBRAZLOŽENJE POJEDINIH RJEŠENJA

Ovim amandmanom brišu se etničke odrednice u uvodnom dijelu člana V Ustava BiH koji govori o strukturi Predsjedništva BiH.

Postojećim rješenjem da se Bošnjak i Hrvat biraju u Federaciji, a Srbin u Republici Srpskoj, diskriminiraju se građani BiH koji ne pripadaju konstitutivnim narodima bez obzira u kojem entitetu BiH žive, kao i Srbi u Federaciji, te Hrvati i Bošnjaci u Republici Srpskoj.

Rješenjem iz ovog amandmana ta diskriminacija se uklanja i omogućava svim građanima BiH da mogu biti kandidirani za Predsjedništvo BiH bez obzira u kojem entitetu žive.

Jedino ograničenje koje sadrži novo rješenje amandmana je da sva tri člana Predsjedništva BiH moraju biti iz različitih konstitutivnih naroda ili reda Ostalih, što odgovara multietničkoj strukturi BiH i ulozi Predsjedništva BiH kao kolektivnog šefa države.

Izmjena u članu V2.d) Ustava BiH je logična posljedica prethodne izmjene koja se odnosi na strukturu Predsjedništva BiH.

IV – FINANSIJSKA SREDSTVA

Za provođenje ovog amandmana neće biti potrebno osigurati dodatna sredstva u Budžetu institucija BiH.

